



La SSR – ina patruna impurtanta ed in factur economic relevant

Funtauna: ©RTR

Operatura da camera, schurnalist, spezialista dad IT, graficher, manadra da projects, spezialist da HR, controllader, documentalista, reschissur, producenta, manader da redacziun: quai èn mo insaquantas da las numerusas professiuns che la SSR dovra sco patruna en tut las units d'interpresa en l'entira Svizra.



Funtauna: ©Matteo Aroldi - www.matteoroldi.com

Var 6000 personas (4900 plazzas a temp cumplain) lavuran tar la SSR. Ensemen cun sias societads affiliadas TPC e SWISS TXT èn quai circa 7100 personas (5700 plazzas a temp cumplain). Quellas han in **effect da multiplicaturas per l'economia publica**. Cun mintga plazza a temp cumplain è numnadamain colliada in'ulteriura plazza a temp cumplain ordaifer la bransch da medias. Il medem vala era per las 870 plazzas a temp cumplain dals 34 emetturs da televisiun e da radio privats. Facit: en Svizra dependan **passa 13 000 plazzas a temp cumplain** a moda directa u indirecta dal service public medial. (Funtauna: BAK Basilea e rapport annual da la SSR 2016).

In factur economic regional

Sco in studi actual dal BAK Basilea demussa per l'emprima giada è il service public medial in factur economic relevant – betg mo sin nivel naziunal, mabain **era regional**.

- Cun l'activitad economica dal service public medial è colliada en Svizra ina **valor agiuntada brutta da radund 900 milliuns francs ed ina valor da produenzi brutta da circa 1,8 milliardas francs**.
- En Svizra italiana è il service public medial pli che trais giadas uschè impurtant sco en la media naziunala totala. Schebain che la quota da populaziun da la Svizra taliana importa in zic dapli che 4 pertschient, occupa questa regiun 17 pertschient da las plazzas da lavur dal service public medial.
- Era la Svizra franzosa ha in pli aut grad d'occupaziun (29 pertschient) en il sector dal service public medial en relaziun cun sia quota da populaziun (26 pertschient).



Funtauna: ©SRF/Frank Zauritz

Moderatur Frank Baumann e l'equipa tar lavurs da filmar l'emissiun «Grüezi Deutschland»



Funtauna: ©RSI/Loreta Daulte

Preparaziuns per ina intervesta a Locarno



Funtauna: ©RTR

Registraziun d'ina moderaziun tar RTR

Preschent en tut las parts dal pajais

La SSR ha l'incumbensa da resguardar las particularitads dal pajais ed ils basegns dals chantuns en ses programs da radio e televisiun (art. 24 LRTV).

Sco suletta interpresa da medias producescha ella en tut ils territoris linguistics da la Svizra purschidas da program audiovisualas **al lieu**.

«Al lieu» vul dir concretamain en **7 studios principals** a Turitg, Berna, Basilea, Cuira, Lugano, Losanna e Genevra sco er en **17 studios regionalis** – da Scuol fin Delémont e da Schaffusa fin Sitten (funtauna: publicaziun da la SSR «Für alle», 2016).

SRF ha en Svizra ina rait da correspondentes da **var 25 schurnalistas e schurnalists** che rapportan d'emprim maun da las differentas regions da la Svizra.

Vitiers vegnan radund **80 plazzas da lavur da SRF** en ils **7 studios regionalis** en Svizra Oriental, a Turitg/Schaffusa, Berna/Friburg/Vallais, en Svizra Centrala, en l'Argovia/Soloturn, a Basilea/Basilea-Champagna ed en il Grischun.

RTR porscha 15 plazzas da lavur en las regions. Quellas èn repartidas a Scuol, Samedan, Savognin, Glion, Mustér e Berna.

RSI reparta sias **20 plazzas da lavur** en Svizra sco suonda: Berna 6, Cuira 6, Turitg 5, Genevra 3.

Tar RTS rapportan circa 60 correspondentas e correspondentes da l'entira Svizra. Biros regionalis sa chattan a Losanna, Genevra, Friburg, Moutier-Delémont-Bienna, Neuschatel e Sitten.

La SSR porscha cundiziuns da lavur socialas, fairas e transparentas

Las collavuraturas ed ils collavuratur da la SSR han **cundiziuns d'engaschament e da lavur attractivas**. L'onn 2016 eran sutta-mess 85,3 pertschient da las collavuraturas e dals collavuratur al contract collectiv da lavur, 8,6 pertschient faschevan part dal cader. Ils 6,1 pertschient restants lavuravan damain che 30 pertschient ed avevan perquai in contract da lavur individual (funtauna: rapport annual da la SSR 2016, p. 80).

Igl è in fatg ch'ils **custs da personal** en ina chasa da medias èn relativamain auts. Bliers profils professionals en la SSR pretendan qualificaziuns pli autas: 42 pertschient da las collavuraturas e dals collavuratur han terminà in studi da scola auta u da scola auta spezialisada, tar las activitads schurnalisticas èn quai schizunt 65 pertschient.

L'onn 2016 ha importà la paja annuala da la SSR la pli bassa 52 000 francs e la pli auta 536 314 francs (incl. cumpart da prestaziuns e prestaziuns supplementaras). Quai correspunda ad ina relaziun dad 1 a 10,3 (funtauna: rapport annual da la SSR 2016, p. 87).

En sia strategia d'interpresa ha la SSR prendi en mira **d'augmentar la quota da dunnas en il cader fin l'onn 2020 per 30 pertschient**. Cun actualmain 28 pertschient ha la SSR gia bunamain cuntanschi questa finmira (funtauna: . rapport annual da la SSR 2016, p. 97).



Funtauna: ©SRF/Oscar Alessio

La SSR è ina partenaria fidada

Partenaris da fatschenta e partenaris socials pon sa fidar da la SSR. Uschia per exempel il Sindicat svizzer dals meds da massa (SSM) che represchenta ils employiads en las medias electronicas. Il SSM e la SSR han elavurà ensem in contract collectiv da lavur – quel vala anc fin ils 31 da december 2018. Era cun la TPC AG, la societad affiliada da la SSR, ha il SSM fatg in contract collectiv da lavur.

La SSR dat paisa a la furmaziun ed al perfecziunament

La SSR dat paisa a l'ulterior svilup da sias collavuraturas e ses collavuratur e planisescha la successiun da posiziuns-clav. La SSR ha investì ils ultims trais onns circa 2,5 dis per persuna ed onn, resp. var 7,5 milliuns francs ad onn en la furmaziun ed il perfecziunament da sias collavuraturas e ses collavuratur.

La SSR e sias unitads d'interpresa furman emprendistas ed emprendists motivads e principiants en il mund da lavur en differents secturs e lieus. Mintg'onn lavuran en la SSR circa 50 emprendistas ed emprendists e var 80 praticantas e praticants. Plinavant survegnan mintg'onn radund 70 stagiarias e stagiaris (stagiarias e stagiaris fan ina scolaziun schurnalistica complementara a la professiun, savens al MAZ a Lucerna) la schanza da cumenzar ina carriera schurnalistica.




Funtauna: ©SRF/Oscar Alessio

Davos tut la tecnica èn era persunas



Funtauna: ©RTS/Laurent Bleuze

La redacziun d'actualitad da RTS



Funtauna: ©Olivia Item

Hugo Schär preschenta las novitads da radio da RTR



Funtauna: ©SRF/Samuel Trümpy

Senza moderatura e personal da camera na datti nagins purtrets dal cumin da Glaruna



Funtauna: ©RTS/Laurent Bleuze

Per filmar l'usit «Silvesterclausen» sto l'um da camera supportar la fradaglia

La SSR sa concentrescha sin cooperaziuns

La SSR tgira dapi daditg cooperaziuns cun chasas da medias privatas e publicas sco era cun numerusas instituziuns da furmaziun, tranter auter cun il **Center da scolaziun da medias (MAZ)** a Lucerna, la **Fondation du Centre de Formation au Journalisme et aux Médias (CFJM)** a Losanna, la **Fondation de formation continue pour le cinéma et l'audiovisuel (FOCAL)** a Losanna, la **Scola auta da tecnica ed economia** a Cuira, sco era cun diversas autras instituziuns.

Sco chasa da medias publica garantescha la SSR solidaritad federala: **73 pertschient da las entradas da taxas derivan da la Svizra tudestga che survegn però mo 43 pertschient da quellas. La Svizra franzosa survegn 33 pertschient, la Svizra taliana 22 pertschient e la Svizra rumantscha 2 pertschient.** Sche la populaziun da la Svizra taliana stuess finanzia suletta la purschida da program da RSI, n'importassan las taxas da recepziun betg 451 francs, ma bain passa 2300 francs.